



UNDANG-UNDANG MALAYSIA

Akta A1611

**AKTA KUMPULAN WANG SIMPANAN PEKERJA
(PINDAAN) 2019**

Tarikh Perkenan Diraja 30 Disember 2019

Tarikh penyiaran dalam *Warta* 31 Disember 2019

Hakcipta Pencetak (H)

PERCETAKAN NASIONAL MALAYSIA BERHAD

Semua Hak Terpelihara. Tiada mana-mana bahagian jua daripada penerbitan ini boleh diterbitkan semula atau disimpan di dalam bentuk yang boleh diperolehi semula atau disiarkan dalam sebarang bentuk dengan apa jua cara elektronik, mekanikal, fotokopi, rakaman dan/atau sebaliknya tanpa mendapat izin daripada **Percetakan Nasional Malaysia Berhad (Pencetak kepada Kerajaan Malaysia yang dilantik)**.

UNDANG-UNDANG MALAYSIA

Akta A611

AKTA KUMPULAN WANG SIMPANAN PEKERJA (PINDAAN) 2019

Suatu Akta untuk meminda Akta Kumpulan Wang Simpanan Pekerja 1991.

[]

DIPERBUAT oleh Parlimen Malaysia seperti yang berikut:

Tajuk ringkas dan permulaan kuat kuasa

1. (1) Akta ini bolehlah dinamakan Akta Kumpulan Wang Simpanan Pekerja (Pindaan) 2019.

(2) Akta ini mula berkuat kuasa pada tarikh yang ditetapkan oleh Menteri melalui pemberitahuan dalam *Warta* dan Menteri boleh menetapkan tarikh yang berlainan bagi permulaan kuat kuasa peruntukan yang berlainan Akta ini.

Pindaan seksyen 4

2. Akta Kumpulan Wang Simpanan Pekerja 1991 [*Akta 452*], yang disebut “Akta ibu” dalam Akta ini, dipinda dalam perenggan 4(1)(d)—

(a) dengan menggantikan perkataan “lapan belas” dengan perkataan “dua puluh”;

- (b) dalam subperenggan (i), dengan memasukkan sebelum perkataan “lima” perkataan “tidak lebih daripada”;
- (c) dalam subperenggan (ii), dengan memasukkan sebelum perkataan “lima” perkataan “tidak lebih daripada”;
- (d) dalam subperenggan (iii), dengan memasukkan sebelum perkataan “lima” perkataan “tidak lebih daripada”; dan
- (e) dalam subperenggan (iv)—
 - (i) dengan menggantikan perkataan “tiga” dengan perkataan “tidak lebih daripada lima”;
 - (ii) dengan memasukkan selepas perkataan “mempunyai” perkataan “pengetahuan atau”;
 - (iii) dengan memasukkan selepas perkataan “perniagaan” perkataan “, ekonomi, keselamatan sosial”; dan
 - (iv) dengan menggantikan perkataan “pengalaman lain yang berkaitan” dengan perkataan “pengetahuan atau pengalaman lain yang berkaitan”.

Pindaan seksyen 6

3. Seksyen 6 Akta ibu dipinda—

- (a) dengan menomborkan semula seksyen yang sedia ada sebagai subseksyen (1);
- (b) dalam subseksyen (1) yang dinomborkan semula, dengan memotong perkataan “dan adalah layak untuk dilantik semula”; dan
- (c) dengan memasukkan selepas subseksyen (1) yang dinomborkan semula subseksyen yang berikut:

“(2) Seseorang ahli Lembaga yang disebut dalam subseksyen (1) adalah layak untuk dilantik semula tetapi tiada ahli boleh memegang jawatan bagi tempoh keseluruhan melebihi dua belas tahun.”.

Pindaan seksyen 9

4. Seksyen 9 Akta ibu dipinda—

(a) dengan menggantikan nota bahu dengan nota bahu yang berikut:

“Kuorum Lembaga”; dan

(b) dalam subseksyen (1), dengan menggantikan perkataan “enam” dengan perkataan “lapan”.

Pindaan seksyen 18

5. Subseksyen 18(1) Akta ibu dipinda—

(a) dengan memotong perenggan (c); dan

(b) dalam perenggan (e)—

(i) dengan menggantikan perkataan “tiga” dengan perkataan “empat”;

(ii) dengan memasukkan selepas perkataan “mempunyai” perkataan “pengetahuan atau”;

(iii) dengan memasukkan selepas perkataan “perniagaan” perkataan “, ekonomi”; dan

(iv) dengan menggantikan perkataan “pengalaman lain yang berkaitan” dengan perkataan “pengetahuan atau pengalaman lain yang berkaitan”.

Pindaan seksyen 39

6. Seksyen 39 Akta ibu dipinda—

(a) dengan menggantikan nota bahu dengan nota bahu yang berikut:

“Menghalang orang daripada meninggalkan Malaysia tanpa membayar caruman”;

(b) dalam subseksyen (1)—

(i) dengan menggantikan perenggan (a) dengan perenggan yang berikut:

“(a) Jika ketua pegawai eksekutif mempunyai sebab untuk mempercayai bahawa mana-mana orang hendak atau berkemungkinan akan meninggalkan Malaysia tanpa membayar mana-mana caruman yang tertunggak dan kena dibayar di bawah Akta ini, ketua pegawai eksekutif boleh mengeluarkan kepada Ketua Pengarah Imigresen suatu perakuan yang mengandungi butir-butir mengenai orang itu dan caruman yang tertunggak dan kena dibayar dengan permintaan supaya orang itu dihalang daripada meninggalkan Malaysia, melainkan jika dia membayar caruman yang tertunggak dan kena dibayar itu, atau mengemukakan jaminan sehingga memuaskan hati ketua pegawai eksekutif bagi pembayarannya.”;

(ii) dalam perenggan (b), dengan menggantikan perkataan “pembuangan negeri atau imigresen, Ketua Polis Negara atau” dengan perkataan “imigresen,”; dan

(iii) dalam perenggan (d), dengan menggantikan perkataan “wang yang kena dibayar” dengan perkataan “caruman yang tertunggak dan kena dibayar”;

(c) dalam subseksyen (2), dengan memotong perkataan “, pegawai polis”; dan

(d) dengan memasukkan selepas subseksyen (2) subseksyen yang berikut:

“(3) Mana-mana orang yang, mengetahui bahawa suatu perakuan telah dikeluarkan berkenaan dengannya di bawah subseksyen (1), meninggalkan Malaysia tanpa membayar semua caruman yang tertunggak dan kena dibayar yang dinyatakan dalam perakuan itu atau mengemukakan jaminan sehingga memuaskan hati ketua pegawai eksekutif bagi pembayarannya melakukan suatu

kesalahan dan boleh, apabila disabitkan, dipenjarakan selama tempoh tidak melebihi enam bulan atau didenda tidak melebihi dua ribu ringgit atau kedua-duanya.

(4) Bagi maksud seksyen ini, “caruman” termasuklah apa-apa dividen atau caj lewat bayar yang kena dibayar ke atas mana-mana caruman.”.

Pindaan seksyen 43

7. Subseksyen 43(8) Akta ibu dipinda—

- (a) dalam perenggan (c), dengan memasukkan selepas perkataan “pekerja” perkataan “, sama ada atau tidak”; dan
- (b) dalam perenggan (d), dengan menggantikan perkataan “mengikut pengertian Akta ini” dengan perkataan “, sama ada atau tidak mengikut pengertian Akta ini,”.

Bahagian baharu VB

8. Akta ibu dipinda dengan memasukkan selepas Bahagian VA bahagian yang berikut:

“BAHAGIAN VB

PEMILIHAN OLEH AHLI KUMPULAN WANG UNTUK MEMINDAHKAN CARUMANNYA

Pemindahan caruman pekerja

53c. Caruman ahli Kumpulan Wang yang disentuh oleh pemindahan ke dalam akaun ahli Kumpulan Wang yang lain di bawah Bahagian ini adalah caruman pekerja ahli Kumpulan Wang yang pertama disebut.

Pemilihan oleh ahli Kumpulan Wang untuk memindahkan carumannya

53d. (1) Walau apa pun seksyen 51 dan tertakluk kepada syarat-syarat dan kriteria yang dinyatakan dalam Jadual Kelapan, seseorang ahli Kumpulan Wang boleh memilih

untuk memindahkan carumannya pada kadar yang dinyatakan dalam Jadual Kelapan ke dalam akaun ahli Kumpulan Wang yang lain yang merupakan isteri atau isteri-isterinya yang sah.

(2) Seorang ahli Kumpulan Wang yang memilih untuk memindahkan carumannya hendaklah membuat suatu permohonan kepada Lembaga dengan mengemukakan apa-apa butir atau dokumen, dan mengikut apa-apa cara, sebagaimana yang ditentukan oleh Lembaga.

(3) Selepas menerima suatu permohonan di bawah subseksyen (2), Lembaga hendaklah memindahkan caruman ahli Kumpulan Wang yang memilih untuk memindahkan carumannya ke dalam akaun ahli Kumpulan Wang yang lain yang dipilihnya secara bulanan atau mengikut apa-apa tempoh lain yang ditentukan oleh Lembaga tertakluk kepada caruman yang ada dalam akaun ahli Kumpulan Wang yang membuat pemilihan itu.

Penghentian pemindahan caruman

53E. (1) Apabila berlakunya mana-mana hal keadaan yang dinyatakan dalam Jadual Kelapan berhubung dengan suatu pemindahan caruman, ahli Kumpulan Wang yang telah memilih untuk memindahkan carumannya di bawah seksyen 53D boleh memohon kepada Lembaga untuk menghentikan pemindahan itu.

(2) Suatu permohonan bagi penghentian pemindahan caruman di bawah subseksyen (1) hendaklah dibuat kepada Lembaga dengan mengemukakan apa-apa butir atau dokumen, dan mengikut apa-apa cara, sebagaimana yang ditentukan oleh Lembaga.

(3) Selepas menerima suatu permohonan di bawah subseksyen (2), Lembaga hendaklah menghentikan pemindahan caruman itu.

(4) Apa-apa amaun yang telah dipindahkan ke dalam akaun ahli Kumpulan Wang yang menerima caruman yang dipindahkan sebelum tarikh penghentian pemindahan caruman itu hendaklah dikekalkan dalam akaun ahli Kumpulan Wang itu.

Pemindahan semula caruman

53F. Jika caruman di bawah seksyen 53D telah dipindahkan secara silap, Lembaga boleh memindahkan semula caruman itu, termasuk apa-apa dividen, ke dalam akaun ahli Kumpulan Wang yang telah memilih untuk memindahkan caruman itu, tertakluk kepada amaun yang ada pada kredit ahli Kumpulan Wang yang telah menerima caruman yang dipindahkan secara silap itu.”.

Pindaan seksyen 55A

9. Subseksyen 55A(2) Akta ibu dipinda dengan menggantikan perkataan “Perenggan 54(1)(c), (e) dan subseksyen” dengan perkataan “Subseksyen”.

Pindaan seksyen 55B

10. Seksyen 55B Akta ibu dipinda dengan memasukkan selepas subseksyen (2) subseksyen yang berikut:

“(3) Seksyen ini tidak terpakai bagi ahli Kumpulan Wang yang telah mencapai umur lima puluh lima tahun yang tergolong dalam kategori ahli Kumpulan Wang di bawah perenggan 54(1)(c) atau (e) atau perenggan 70c(1)(b) atau (c).”.

Jadual baharu Kelapan

11. Akta ibu dipinda dengan memasukkan selepas Jadual Ketujuh jadual yang berikut:

“JADUAL KELAPAN

[Seksyen 53D dan 53E]

PEMILIHAN OLEH AHLI KUMPULAN WANG UNTUK MEMINDAHKAN
CARUMANNYA

Pemindahan caruman ahli Kumpulan Wang ke dalam akaun ahli Kumpulan Wang yang lain yang merupakan isteri atau isteri-isterinya yang sah

- (1) Tertakluk kepada kriteria yang dinyatakan dalam ruang (1) dan (2) jadual yang berikut, seseorang ahli Kumpulan Wang boleh memilih untuk memindahkan carumannya pada kadar yang dinyatakan dalam ruang (3)

ke dalam akaun ahli Kumpulan Wang yang lain yang merupakan isteri atau isteri-isterinya yang sah dan perkahwinan mereka telah didaftarkan di bawah undang-undang Malaysia.

- (2) Pemindahan caruman boleh dihentikan oleh ahli Kumpulan Wang yang memilih untuk memindahkan carumannya apabila berlakunya mana-mana hal keadaan yang berikut:
- (a) pembubaran perkahwinan antara ahli Kumpulan Wang yang memilih untuk memindahkan carumannya dengan ahli Kumpulan Wang yang menerima caruman yang dipindahkan itu;
 - (b) kematian ahli Kumpulan Wang yang menerima caruman yang dipindahkan itu.

(1) Kriteria ahli Kumpulan Wang yang memilih untuk memindahkan carumannya	(2) Kriteria ahli Kumpulan Wang yang menerima caruman yang dipindahkan	(3) Kadar caruman yang akan dipindahkan
Ahli Kumpulan Wang itu— (a) merupakan warganegara Malaysia atau bukan warganegara Malaysia; dan (b) menerima caruman majikan secara bulanan	Ahli Kumpulan Wang itu merupakan warganegara Malaysia	$\frac{2\%}{11\%} \times \text{pekerja ahli Kumpulan Wang yang memilih untuk memindahkan caruman itu}$ <p>Jumlah caruman yang termasuk wang sen hendaklah dikenakan kepada ringgit yang berikutnya”.</p>